

Чумчуккынг овчиға ўгити



20:09 / 02.12.2018 3376

Бир овчи чумчукқа тузоқ қўйди. Бир чумчукни тутди. Овланган чумчук тилга кириб дедики:

- Эй овчи сен шу вақтгача қўйлар, сигирларни единг. Улар билан тўймадинг. Энди менинг арзимас гўштимга тўясанми? Мени қўйиб юбор, эвазига сенга фойдали учта ўгит айтаман... Бу ўгитлардан бирини қўлингда, қолганини эса дараҳтда сўйлайман.

Овчи: "Яхши", деди. Чумчук илк маслаҳатини берди: "Бўлмайдиган нарсага, ким сўйласа сўйласин, ишонма.

Овчи иккинчи ўгитни эшитиш учун чумчукни қўйиб юборди. Чумчук томга қўнди, иккинчи ўгитни айтди:

- Ўтган кетган нарсалар учун ғам ема. Фурсатни бой берсанг, хафа бўлма. Айни пайтдаги вақтнинг баҳосини бил. Пушаймонлик билан вақт ўтказма...

Сўнгра қўшимча қилди:

- Эй овчи, менинг қорнимда ўн дирҳамга тенг бебаҳо инжу бор эди. Сенга ҳам, сендан кейингиларга ҳам етарди. Афсус, қисматинг экан, қўлдан

қочирдинг. Бу инжуnung дунёда бошқа бир тенги бўлмас.

Овчи:

- Оҳ нима қилиб қўйдим, нима учун қўйиб юбордим-а, дея қайғуриб йиғлай бошлади. Шу пайт чумчуқ:

- Эй, овчи нега йиғлаляпсан. Мен сенга ўтган-кетган нарсалар учун ғам ема. Фурсатни йўқотсанг, хафа бўлма, дея ўгит бермадимми? Сўнгра сенга яна айтмадимми: "Бўлмаган нарсага ким сўйласа сўйласин, ишонма" деб. Қандай анқов одамсан... Мен ўзим уч дирҳам чиқмайман. Қандай қилиб қорнимда ўн дирҳамлик инжу бўлсин?...

Овчининг ҳуши жойига келди. Зийрак қушга қараб деди:

- Яхши, шу учинчи гўзал ўгитинг нима? Уни ҳам айт!

Чумчук девордан ўтиб дарахтга қўнди. Масхарали бир оҳангда:

- Эй барака топгур, икки ўгитимга амал қилмадинг, учинчисини нима қиласан, қўявер, вақтимни олма, дея учиб кетди.

Овчи жойида тош қотиб турарди.

"Маснавийдан ҳикоялар" китобидан